

欽定剿平粵匪方略

欽定剿平粵匪方略卷一百九十七 戊午年

六月初二日 丙午 河南巡撫英桂署河南巡撫布

政使瑛棨奏言逆匪自楚境竄踞商城之馮店
地方意圖圍攻商城該縣知縣戴鴻經督同紳
勇堵禦邱聯恩亦督兵由光山馳至賊卽折由
東南山徑奔竄我兵跟蹤追至大順店池南賊
在山內盤踞約二千餘人該處地勢環繞皆山

嶠嶇險阻非四而撓擊不能得手適楚比追兵
副都統舒保督帶馬隊趕到卽約會戴鴻經等
各帶兵團分路進擊直衝上山賊衆抵死拒敵
鏖戰三時賊勢不支紛紛越山向東南奔竄我
兵追殺數十里斃賊三百餘名墜巖死者不計
其數生擒僞帥邵城之等二十一名正法初九
日知府周祖頤等擊賊於銀山畝等處斃匪二

百餘名十一日敗匪千餘人在丁家埠等處
息邱聯恩等帶兵擊勦復斃匪三百餘名生擒
僞副天官燕五牲等五名查探餘匪由琉璃坪
等處遠竄六安一帶光商境內肅清臣等仍飭
邱聯恩督飭地方官紳嚴密巡防以杜竄越奏
入報

初三日丁未和春奏言我師進勦金陵斷賊接濟

自西南濠壘完竣後該逆情急潰圍屢由聚寶門雨花臺一帶傾巢衝突所有城中大股醜類無不麕集西南其北路各門守禦必虛五月初三日張玉良等選精銳千餘名分攻太平金川各門馮子材等會合水師攻擣下關賊巢以分其勢東北城外賊營距城一二里者皆爲我軍

踏毀無遺該逆於近城處築一半月形營壘極其堅厚以護城門我軍環攻許久太平門內竄出悍賊三四千纔擁來撲我師伏於牆內轟擊斃賊甚多張玉良見賊勢稍卻遂同遊擊孔朝彪等從柵門突出三面夾擊鏖戰兩時許將該逆分爲數段正截殺閒神策門逆援又至張玉良轉戰直前疊殪執旗賊目乘勝將賊隊衝散

斃賊無算自龍脖子山梁直至湖邊賊屍枕藉一路跟蹤掩殺統計斃賊六七百名該逆遂伏匿不出現仍督飭水陸各鎮將晝夜戒嚴以防竄越又上游江面自繁昌銅陵以迄蕪湖下抵東西梁山綿亙數百里南北兩岸逆壘分屯賊船出沒刻思下竄以通接濟臣屢檄各軍嚴行堵剿二月二十五及三月初九十七等日總兵李

德麟等派令勇目魏麟魁分駕划艇巡至銅陵江面擊沈賊船五十餘隻斃賊不少又聞南陵之賊竄踞繁昌該鎮親督將弁水陸並進於三月十九日夜間襲復縣城銅陵以上賊划數百號由土橋繞進內河圖竄小丹陽等處二十一日該鎮督同都司黃廣泰等各帶勁旅立撲土橋把總胡煥年等從礮火中踰壘先登諸軍

附而上將土橋逆壘踏平殲斃逆匪一千六七
百名斬首二百餘級五月初八日石碓股匪千
餘撲犯峨橋並由白馬山雙港一帶水陸下竄
窺伺魯港水營遊擊郭定猷等駛駕紅單快蟹
各船分投迎勦斃賊約百餘名餘匪敗回燕壘
初九日該逆從白馬山分股回竄郭定猷等督
帶水勇民團沿途設伏合力兜抄殲斃黃衣賊

目十餘名斬馘尤多十四日大股悍賊撲犯魯
港守備鄭榮勳等前後堯勦短兵相接砍取首
級二百餘顆現仍飭該鎮等嚴密巡防相機進
剿以冀肅清江面奏入

上諭內閣曰金陵逆匪經官軍合圍攻勦勢已窮蹙伏
匿困守著卽督飭將士實力進攻迅復堅城盡殲醜
類毋稍延緩

初五日己酉駱秉章奏言浙江爲東南財賦之區

海運所自出與金陵相爲表裏局勢殊爲緊要

現在援江各軍將領均前兵部侍郎臣曾國藩

所深知之人非其同鄉卽其舊部若令其統帶

楚軍赴援浙江則將士一心於大局必有所濟

且江浙本屬澤國利用舟師楊載福彭玉麟水

師兩軍皆係曾國藩舊部如曾國藩統陸軍赴

浙或從常山更造戰船順流而下或函商楊載
福分派師船由長江入常州從太湖抵湖杭汭
流而上彼此聲息皆通江南大軍旣免後顧之
虞援浙陸軍亦得戈船之助曾國藩前此奏請
終制一疏曾奉

諭旨准其暫行在籍守制現在浙事方殷楚軍赴援急
謀統帥應請

旨飭下曾國藩迅速起程就道精選援江勁旅統率東
行其勇餉一項江西旣不能籌浙江是否卽能
供應亦難豫揣擬由湖南每月籌解餉銀二萬
兩再請

旨飭下湖北撫臣胡林翼每月籌解餉銀二萬兩專供
曾國藩一軍之用奏入

上命軍機大臣傳諭官文胡林翼駱秉章曰據駱秉章

奏現在援江各軍多係曾國藩舊部如該侍郎統帶
赴浙必能將士一心並慮及勇餉一項江西旣不能
籌浙江能否供應尙難豫揣擬由湖南每月籌解銀
二萬兩作爲援浙勇餉實能統籌大局不分畛域著
卽照辦惟湖北省亦當竭力籌畫著官文胡林翼按
月籌解餉銀二萬兩專供曾國藩一軍之用該侍郎
兵力旣精餉需又足必當迅速奏功已定何日起程

卽著駱秉章傳旨令該侍郎卽行馳奏

駱秉章又奏言湖南援江官軍自克復臨江府城後臣以江西各股逆賊久踞撫建爲老巢逆首石達開退竄撫州遣黨分布撫建所屬各縣人數甚衆非節節搜剿不能進擣撫建巢穴隨飭卽選道蕭啟江知府劉坤一帶領各軍分由新淦進取崇仁以圖撫州卽選道張運蘭等率

所部由吉安趨永豐進取樂安宜黃以圖建昌
維時撫州大股逆賊知臨江大軍將渡贛而東
率衆五六萬屯踞何家村等處將俟援軍渡贛
仍襲取臨江府城正月初九日蕭啟江田興恕
簡銳卒出賊不意擊之破賊營十一座斃賊二
千餘名賊懼官軍大隊復至悉衆遁回撫城二
十九日江軍收復新淦縣城蕭啟江劉坤一隨

率所部渡贛分路而進二月二十九日蕭啟江
擊賊於崇仁縣屬之白波墟三月初六日進偪
崇仁縣城賊由西南北三門出拒官軍分隊迎
擊斃賊數百賊敗入城是夜三更城中火發賊
由東門竄出遂復崇仁縣城十八日蕭啟江進
軍上頓渡距撫州城十五里築營建昌之賊見
官軍漸偪撫郡遂率黨數千將由龍骨渡以陷

崇仁劉坤一偵知之率五成隊銜枚疾進二十
二日黎明抵龍骨渡西岸賊倉卒出禦劉坤一
急揮所部涉淺而過斬先鋒賊十餘人餘賊潰
走各勇奮躍衝殺踏平賊營七座殺賊四五百
名撫州賊黨鑒於瑞州臨江均以長圍被殲見
官軍漸逼府城建昌援賊又屢爲官軍所敗益
無固志四月十九日蕭啟江移營高橋偃之是

夜環城攻擊槍礮不絕城內人聲鼎沸二十日
賊開東門竄山蕭啟江揮所部緣梯蟻附而入
劉于瀉所部亦由北梯城而入該逆自相踐踏
賊屍枕藉官軍巷戰數時殺賊一千七百餘名
隨復撫州府城此蕭啟江劉坤一等一路獲勝
收復崇仁縣城撫州府城之實在情形也其張
運蘭王開化之由永豐進者二月初八日進紮

太湖坪盤安洲等處樂安賊悉退踞縣城普承堯適自吉安帶親兵馳至會商參將朱南桂等各派隊攻城破城外賊營六座斃賊六百餘名十五日各營齊偪城下是夜暗伏壯士於城外舊壘三更城賊悉由東北兩門竄出伏兵鼓譟乘之賊自相踐踏死者百餘遂復樂安縣城張運蘭王開化旋由樂安拔營進攻宜黃三月初

四日張運蘭所部行抵官倉距宜黃縣城數里
探報城賊已於初三日夜由仙人都竄遁遂復
宜黃王開化由桃陽前進已於初六日會同蕭
啟江劉坤一克復崇仁於是建昌賊首復令死
黨屯踞蔡圭墟將伺隙復犯崇仁宜黃以斷撫
州大軍後路二十一日張運蘭等率師前進比
近蔡圭二三里許皆令捲旗潛行而以團勇誘

賊俟其近前分三路抄之斃賊不少立將莖圭
墟賊巢攻破餘匪竄回建昌城中是役計斃賊
一千六七百名墜巖死者無算張運蘭王開化
破莖圭墟後本擬拔營進攻建昌探報南豐屯
賊甚多雩都竄出之賊亦前來會合人數約近
二萬蔓延厚坪水南一帶巢穴甚多張運蘭王
開化分路進剿往返百餘里將南豐以北建昌

以南賊巢十餘處一律掃除斬賊二千有餘四
月初九日南豐縣賊聞各股賊敗卽於初七八
兩日冒雨駕筏棄城東渡張運蘭王開化令幫
辦王文瑞等收復縣城安撫居民暫爲駐守十
八日建昌賊會合新豐股匪來雲霧雙油築四
大壘附近結草營數十座將堅阻官軍攻建之
路朱南桂等會商及其未定擊之遂各率所部

分路並進將賊所築營壘概行踏盡二十二日
建昌賊傾巢而出屯於新豐張運蘭王開化於
是夜三更率全軍趨之二十三日黎明行抵雙
油甫經安營賊隊已徧布對岸張運蘭等令朱
南桂胡兼善各率所部分從上下游涉淺過河
而自率各勇繼之對岸之賊甫過河而來各勇
槍礮齊施紛紛墮水張廣勝等揮衆衝渡賊望

風潰走乘勢銳進連毀賊營三十餘座斃賊無
數餘賊一由尙塘墟奔新城一由大路奔建昌
張運蘭等乘勝追逐至距建昌府城八里之陳
冢山始收隊回營是夜賊卽棄城而遁張運蘭
等遂於二十四日收復建昌府城餘賊向新城
一路紛竄探報撫州逸出餘匪有與此股敗賊
併竄閩界之說張運蘭等擬俟賊有定蹤卽會

合堯勦此張運蘭王開化及江軍寶勇一路疊
勝先後收復樂安宜黃南豐三縣及建昌府城
之實在情形也臣維江西撫建兩郡逆賊踞爲
老巢自蕭啟江劉坤一等率師渡贛而東張運
蘭王開化及普承堯所部寶勇四營由永豐前
進節節搜勦三月之間郡縣城池先後收復進
止機宜尤爲允協卽遷道張運蘭等先行開列

擬請分別獎勵陣亡守備彭家斌等均請

飭部照例從優予卹其餘在事出力員弁勇丁可否由

臣查明保奏出自

恩施奏入

上諭內閣曰湖南兵勇援剿江西三月之間先後收復
府縣城池辦理尙爲得手卽選道張運蘭著賞加按
察使銜知府王開化著以道員選用同知王文瑞著

免選同知以知府選用參將黃萬友著以副將留於
湖南補用陳品南遊擊彭聲發均著以參將留於湖
南卽補陳品南並賞加副將銜都司劉松山王開佶
均著以遊擊留於湖南卽補並賞換花翎朱紹輝著
以遊擊留於湖南補用並賞換花翎參將朱南桂著
以副將留於湖南補用同知胡兼善著賞換花翎千
總張廣勝著以都司留於湖南補用並賞換花翎陣

亡守備彭家斌外委何啟耀羅逢春擬保把總舒進
堂均著交部照例從優議卹其餘由湖南派往出力
之員弁勇丁著駱秉章查明保奏

同日耆齡奏言官軍攻勦撫州逆匪知府劉坤
一一軍自移營秋溪卽大破撲營匪衆並掩擊
龍骨渡巨寇踏營七座卽選道蕭啟江一軍移
營上頓渡兩次擊敗逆衆甘肅安肅道劉于瀄

亦率江軍水師礮船於四月初旬直逼城下撫
郡之賊乞援於建昌旋有花旗賊千餘人竄入
撫城分股竄擾青泥地方十三至十八等日蕭
啟江劉于瀉劉坤一等率水陸各營疊次薄城
圍攻焚其更樓賊館並將橋頭房屋燒燬賊死
無數劉于瀉復密令曾經被擄逃出之臨川縣
職員邱隆光等暗通消息招降廣匪頭目黃揚

以爲內應自是廣匪黨與遂無固志二十日黃
揚密稟劉于瀘定於是日獻城當派蔡康業等
埋伏接應楊泰等進攻西北門自率戰船繼進
遙聞城內喊殺聲知黃揚反開計成卽飭水軍
登岸從北門爬城黃揚已備長梯接應劉于瀘
率勇上城陸隊亦卽擁入蕭啟江率領各營踵
至梯城而上賊悉向東門外逃竄收復郡城查

撫郡城固濠深賊多糧足幸各軍奮勇效命屢
獲勝仗擊敗建賊以絕外援招降廣匪以生內
黨纔踰一月卽拔堅城斃賊數千人獲糧三萬
石尤爲出力之道員蕭啟江等自應先行開列
額懇

恩施其餘出力人員可否容臣查明保奏廣匪賊目黃
揚悔罪投降獻城殺賊擬請免其治罪與所部

數百人留營效力奏入

上諭內閣曰此次攻勦撫州賊匪擊敗外援密約內應一月以來斃賊數千人獲糧三萬石在事各員實屬勞績卓著自應先沛恩施除蕭啟江劉坤一等業由湖南請獎外甘肅安肅道劉于瀄著賞加布政使銜擬保遊擊蔡康業著以參將升用擬保都司萬立松著以遊擊儘先選用擬保守備謝得龍著以都司升

用其餘出力各員著准其查明保奏悔罪投誠之黃
揚著免其治罪與所帶數百人一併留營效力

耆齡又奏言建郡餘匪竄踞新城縣城署新城
縣知縣文明於本年三月十八日繞道入境卽
在東南各都督同紳董設法籌畫陸續募勇三
千五百名於二十六日派生員陳時行等帶勇
分紮各門四面合圍賊衆登城抗拒相持一日

夜二十七日文明督飭各營奮勇薄城賊衆七
八千由西門潰圍而出當卽收復城池餘匪悉
竄福建查新城縣被賊占踞兩載茲因大兵攻
克建昌賊膽已寒該員文明得以乘時募勇迅
復城池惟該縣毗連閩疆難保逆衆不復回竄
現經臣飭將邊界各隘嚴密防守不得稍涉疏
虞在事出力紳勇可否擇尤請獎奏入

上諭內閣曰自官軍克復建昌後署新城縣知縣文明招募鄉勇督同紳董乘時收復縣城辦理尙屬妥速所有出力紳勇准該撫查明請獎

耆齡又奏言撫郡及東鄉縣餘匪先後竄往金谿賊聚甚衆駐防貴溪縣參將劉芳貴於四月二十六日率領寶後副後兩營自貴溪起程二十七日行至堆橋地方探知逆衆七八千屯聚

距金谿縣城二十餘里之黃桶地方四出擄掠
二十八日劉芳貴派撥各勇分三路進攻該逆
屢敗之餘驚魂未定一聞鄰邑勁旅抵境先於
二十七夜逃散大半僅存千餘人見我軍馳至
卽列隊拒敵劉芳貴督飭各勇衝擊槍礮齊施
斃先鋒賊數名賊卽敗退我軍奮力追殺餘匪
悉遁瀘溪卽日收復縣城劉芳貴恐貴邑空虛

率隊折回防所仍留寶勇二哨協同團練防守
金谿該參將辦事奮勇進止合宜各弁勇亦均
得力可否容臣擇尤酌保出自

鴻慈奏入

上諭內閣曰江西撫州敗匪聚集金谿經參將劉芳貴
督帶寶勇進剿立將逆衆擊散收復縣城勦辦尙爲
得手所有在事出力員弁著耆齡擇尤酌保以示鼓

勵

初七日 辛亥 福濟奏言准江西撫臣耆齡來咨江

省漸可肅清賊衆有分竄皖浙之信湖北黃安
麻城克復後逆股分竄安慶皖境實爲賊藪廬
州尺寸之地岌岌可危藩司李孟羣本日已由
六安輕騎抵廬晤商進取惟兵單賊衆餉缺歲
饑一切未易措手適接李續賓函復由楚入皖

勢較順便擬仍遵前次

諭旨先圖皖北分路前進以偏師沿江直擣安慶全軍
則自六舒由北圍繞而南防賊北竄刻下趕辦
行裝稍有端緒卽兼程赴皖等語惟軍行貴速
稍涉稽遲則逆賊得以準備應懇

皇上迅飭官文胡林翼轉催李續賓剋期來皖由舒城
廬江圍繞而南庶粵逆無北竄之虞擒匪無勾

通之患卽可與皖軍分路次第肅清奏入

上命軍機大臣傳諭官文胡林翼李續賓曰此時皖北情形萬分緊急著李續賓迅速前進卽由舒城廬江圍繞而南使捻匪粵逆不能勾結並著官文胡林翼飭令舒保督帶馬隊隨同進剿仍隨時查看皖豫兩省情形相機策應總期節節南逼毋令北竄

福濟又奏言總兵李德麟統帶戰船駐泊蕪湖

上游橫截江面其北岸附近之無爲州久爲賊踞該州土橋神塘河各口岸爲安慶銅陵南北往來要衝賊均築有石壘數座阻塞我師李德麟督率師船快划進攻北岸土橋該處賊壘濠深礮猛更於南之灰河西之新安橋北之青山圩分紮營壘犄角相應四月十三四等日連攻兩次僅破一二外卡十五日師船轉戰三時始

拔灰河一壘十六日先以兵勇一隊登岸繞伏新安橋後以一隊佯趨青山圩賊衆出救我軍乘虛衝燒其寨追我兩隊合攻青山圩賊亦棄壘狂奔十九日上流有賊划四五十隻開礮揚帆而下卽揮水勇快划迎剿逆船駛入土橋河內我軍截獲划船四隻擊沈十餘隻二十一日夜先令快划各勇馳進灰河又令師船乘風向

岸環擊賊衆驚竄斃及落水死者無數五月
十一夜有被脅難民黃受先請攻神塘河賊營
密約內應李德麟卽於次日抽派弁勇並傳無
爲州練勇分爲三隊師船先進奮力環攻至四
更時果見後壘火起賊衆驚潰先後兩壘同時
攻克殺賊六七百人現飭令李德麟激勵水陸
兵勇乘勢進攻迅圖克復州城奏入

上諭內閣曰官軍夾勦無爲州江面攻破賊壘大獲勝
仗著福濟飭令總兵李德麟等乘勢進攻迅拔州城
毋再遲延

初九日癸丑王懿德慶端奏言閩省浦城松溪政

和等縣被逆首僞楊國宗等死力拒守我軍奮
勇攻勦屢有斬獲尙未得手邵武逆匪時圖下
竄兵力不敷兜圍調赴邵武會勦之師屢經改

調他往建甯一縣復被江右新城逆匪攻陷逆
援陸續踵至據藩司保泰稟報江西撫州建昌
等府業已先後收復潰賊均竄閩境克復建昌
之老湘營一軍係道員張運蘭統領克復撫州
之師係道員蕭啟江統領均稱勁旅當此江右
軍情較緩閩省需兵孔急懇請

飭下江西撫臣耆齡迅飭張運蘭蕭啟江兩軍剋日來

閩會同閩省兵勇共殲醜類收復各城奏入

上命軍機大臣傳諭福興耆齡周天受曰浦城等縣被賊踞守邵武逆匪時圖下竄建甯縣失守賊援踵至情形萬分喫緊江西浙江毗連該省自應不分畛域實力兜剿張運蘭蕭啟江各軍前已諭令赴浙助剿現在別無可調之兵福興由玉山至衢州屢失事機本日已有旨令其來京另候簡用所有該將軍帶往

玉山兵勇卽著交耆齡會同周天受酌派得力將領
統帶馳赴浦城等處援剿將失守各屬力圖攻克不
可稍有遲延

上諭內閣曰西安將軍福興著來京另候簡用

王懿德慶端又奏言江右逆匪竄踞邵武郡城
四月二十一至二十六等日軍功趙方林等各
帶練勇分投進剿先後獲勝十餘次生擒賊首

陳榮賚等四十六名訊明正法參將顧飛熊等
一軍於四月二十四日由古山一帶進攻斃匪
二百餘名該逆回城踞守其勢日蹙可期迅速
收復惟邵武府屬之建甯縣突被江右另股匪
徒於四月二十二三等日由白丈隘等處分路
攻入護理都司杜鵬飛等督帶兵勇與賊接仗
失利該逆直撲縣城知縣趙圻等防兵單薄於

二十四日被賊攻陷接壤之泰甯縣愈形危急
附近之順昌將樂甯化建陽等處防務亦形喫
重現飭署延建邵道趙印川激勵兵勇迅將邵
郡建邑城池力圖收復並飭各路將領暨該管
地方文武務將泰甯順昌將樂甯化建陽各縣
嚴密籌防妥爲布置至知縣趙圻等未能設法
固守致被逆匪攻陷城池實屬防守不力相應

請

旨將建甯縣知縣趙圻護理邵武城守右營都司杜鵬
飛一併革職奏入

上諭內閣曰逆匪由百丈隘等處分路竄入建甯縣境
護理都司杜鵬飛等接仗失利知縣趙圻等兵力甚
單以致縣城失守著該督等卽飭趙印川激勵兵勇
迅將邵武及建甯城池克復毋任蔓延建甯縣知縣

趙圻護理邵武城守營都司杜鵬飛未能固守著一併革職查明有無聞警先避情事按律懲辦

十一日 乙卯 官文都興阿胡林翼奏言皖省太湖

英霍之賊於五月十五日進逼太湖縣彌陀鎮沿河築壘同知丁銳義等分由桐山沖等處進擊殺賊五六百名英山又有另股賊匪來犯十七日傾巢而出於太湖縣彌陀鎮河岸山岡層

密列陣遊擊余際昌等由左路進逼賊卽奔潰
我軍以賊不戰而潰必有狡計均屹立以待旋
見山溝伏賊突出守備唐啟虞等首先衝敵參
領巴彥都楞率馬隊繼之追殺七八里將太湖
縣彌陀鎮附近賊壘木柵全行踏平斃賊千餘
名我軍於十九日五更時直逼太湖之南陽河
未及交鋒賊卽潰走我軍奮力窮追賊四散奔

逃殲斃四五百名平壘三十餘座太湖之賊於
二十日下退石牌同日英山之賊亦退至黃栗
抄一帶現在李續賓已調派副將趙克彰等九
營先期馳赴英山探明太湖六安等處賊情相
機進剿李續賓自率大隊前往會合以便肅清
皖北節節掃蕩所有尤爲出力員弁先行開列
懇

恩分別獎勵奏入

上諭內閣曰皖省太湖英霍之賊窺伺蘄黃邊境並於
彌陀鎮南陽河等處築壘抗拒同知丁銳義等帶領
兵勇由桐山沖界牌等處分隊進擊將附近彌陀鎮
之賊壘木柵全行踏平餘賊全數敗遁我軍直徧南
陽河賊卽奔潰平壘三十餘座太湖英山之賊均已
退至石牌黃栗抄一帶楚境一律肅清勦辦甚爲得

手著官文等仍嚴飭帶兵將士分路追勦節節埽蕩
肅清皖北以靖逆氛在事尤爲出力之同知丁銳義
著以運同儘先升用遊擊余際昌張嵩齡均著免補
遊擊以參將儘先補用並賞加副將銜都司朱恢三
唐文山均著免補都司以遊擊儘先補用並賞加參
將銜守備唐啟虞李德彥楊作霖夏全勝均著免補
守備以都司儘先補用唐啟虞李德彥夏全勝並賞

換花翎千總陳新泰曾鎮國均著免補千總以守備
儘先補用其餘出力員弁准其擇尤保奏

十二日丙辰福興奏言此次竄犯壽昌賊匪不過

二千餘人其中裹脅居多據探總兵李定太已
督率所部於二十八日進抵壽昌餘匪退竄上
方一帶疊據獲賊供稱此股實係江常竄匪衢
郡城外賊黨嘯聚如前臣卽設法進攻於二十

七日親督隊伍從河灣一路而進漸偏漸近該
逆密排槍礮層疊轟擊遊擊馮日坤身中礮傷
臣以我軍事攻一面該逆必以全力抗拒徒傷
精銳遂收隊旋營再圖進剿二十九日復由北
岸整隊前行城中亦添派兵勇從東門出分攻
逆壘臣見攻剿正在喫緊卽親督湖廣兵勇併
力環攻忽被槍子打入左脇仍裏傷督戰該逆

并死相持賊營堅不可拔旋即收隊現臣在營
趕緊醫治一面照會饒廷選繆梓等督率在城
將士嚴密防守並飛飭李定太林保等俟壽境
肅清後即行馳赴衢防以資協剿奏入

上命軍機大臣傳諭福興晏端書周天受曰前於四月
二十九日有旨諭知福興令其俟衢州解圍後即帶
所部兵二千五百名馳赴浦城一帶進剿閩省之賊

昨復寄諭該將軍令將所部兵勇卽交周天受會同
耆齡酌派得力將領統帶馳赴閩省援剿該將軍本
日奏報旣未遵旨赴閩又復督戰受傷著卽起程回
京不必再留衢郡周天受接奉昨降諭旨應派何員
帶兵赴閩或聽耆齡酌派或就近與晏端書商派以
期迅速並著妥籌具奏壽昌賊匪已退竄上方李定
太帶兵素稱得力今福興所帶兵勇旣派赴閩省恐

衢城兵力稍單著晏端書卽飭該總兵俟壽昌匪徒
勦除後酌量情形先其所急或馳赴衢州與饒廷選
等殲除城外賊壘再圖克復失陷各縣使賊蹤不至
續來則下游勦辦亦易得手晏端書周天受等當通
籌緩急分投勦辦毋致顧此失彼貽誤事機

欽定剿平粵匪方略卷一百九十八 戊午年

六月十三日丁巳德興阿翁同書鞠殿華奏言五

月二十五日臣鞠殿華由小店拔營與海全合
兵一處二十九日進逼全椒城南賊於城外築
壘五座環包東西南三面官兵甫到未齊突出
賊萬餘排列柵外蠶擁迎敵臣鞠殿華與海全
等兵分三路深入賊隊將東面賊壘三座踹平

殺賊八百餘名六月初三日臣鞠殿華與海全帶馬步兵勇直薄城下盡燬賊壘燃及城門臣鞠殿華從火光中率眾撲城適槍子從臣鞠殿華右頰穿過耳根左膀亦被槍傷力戰不敢少卻時東門突出賊股約二三千人海全調回攻城之眾併力迎衝賊望風卽奔乘勢壓下追殺三百餘人城賊遂匿不出再前月二十六日富

明阿溫紹原等分路進偏滁城城內出賊二三千人迎拒被勦不及入城四野奔竄我軍追壓斬獲甚衆二十九日賊衆忽乘風雨糾約五六千人奔躍而來富明阿率帶馬隊馳入賊叢縱橫馳突賊隊自亂驚竄回奔自二十六至二十九等日共殺賊一千餘名落河淹斃者不計其數又九洲一帶阻水防範益當嚴密前月二

十四日賊乘夜繞至上游之龍王廟圖襲前敵
營盤趙樹棠劉琮分路齊出沿岸環攻賊卽敗
退是夜水師黃彬等分哨江而於西江口見有
賊船揮令快艇兜圍夾擊奪獲賊船二隻賊匪
落水甚衆生擒長髮老賊三名搜獲僞文僞印
多件現擬乘江水平復進攻九浹洲賊巢已密
飭陳國泰等各相上下游風色更番遞進接續

分攻用期得手奏入報

德興阿又奏言安徽地方自福濟接辦軍務以來與鄭魁士意見不合惟聽信文員之言以致軍心離間若仍令福濟督辦恐致貽誤事機臣與翁同書共事兩載有餘凡商籌防剿一切無不和衷共濟其爲人詳慎敏捷頗得兵心惟有

顙懇

天恩將翁同書派赴安徽廬州會同德安辦理實於軍
務人有裨益如蒙

俞允擬派精銳兵一千名隨同翁同書前往臣速將九
洲賊巢攻克仍往安徽會同翁同書悉心辦
理奏八

上命軍機大臣傳諭德興阿鞠殿華翁同書曰福濟辦

理安徽軍務徒知株守日久無功已明降諭旨革去
頭品頂戴太子少保銜令其來京另候簡用並授翁
同書爲安徽巡撫督辦軍務矣翁同書接奉此旨卽
酌帶官兵馳赴新任務須力圖整頓俛皖省軍務日
有起色方爲不負委任此時金陵尙未克復江北之
防不容稍懈若克復九洲後該大臣移營赴皖恐
該逆乘虛北竄實於大局有關現在李續賓已由楚

赴皖埽蕩皖北賊匪都興阿亦由宿太前來廬州一帶攻剿可期得力德興阿請帶兵前往安徽之處著毋庸議此次鞠殿華攻剿全椒身受重傷實屬奮勇可嘉著發去如意拔毒散四料交該總兵祇領

上諭內閣曰安徽巡撫福濟自克復廬州後不能振作日久無功以致賊勢蔓延實難辭咎著革去頭品頂戴並太子少保銜卽行來京另候簡用

上又諭內閣曰翁同書著補授安徽巡撫督辦軍務

同日晏端書奏言衢州北路之賊自竄壽昌後
分股三四千人竄入蘭谿之界子嶺總兵李定
太自遂安馳抵湯溪連營十餘里五月二十七
日該逆沿河焚掠窺探虛實適署臬司段光清
從嚴州雇備渡船馳至各兵勇連夜渡河掩其
不備卽將沿路賊卡盡行燒燬進逼壽昌東門

外七里亭二十八日李定太派遊擊萬泰等從
白沙埠等處分道而進直抵賊巢逆衆四散潰
奔我軍追出西路大同一帶沿途斬獲無數所
有東南北各路賊壘一律蕩平當將壽昌縣城
克復李定太遂令該縣知縣程炳謙安撫居民
並飭王進修等駐紮防守卽由大同進發就近
馳赴衢州會剿至衢州軍情自五月初七至十

五等日該逆連次撲城均被我軍擊退惟城圍
三月未解該逆復分黨與蔓延處金嚴三府屬
各路援師雖多無不爲其牽掣必得速解衢城
之圍攻取常山開化並以重兵嚴堵江山先斷
賊援庶可分路進剿衢州鎮總兵饒廷選優柔
玩愒不能振作深慮因循貽誤應請先行革職
仍令帶罪留營以觀後效李定太統師直抵衢

州亟應乘此聲威痛加勦洗臣不敢稍事拘泥
業已咨明和春並與周天受會咨李定太接署
衢州鎮篆以期激勵將士早解城圍奏入

上諭內閣曰壽昌逆匪竄入蘭谿之界子嶺總兵李定
太自遂安馳抵湯溪進偪壽昌東門外七里亭分路
夾擊斬獲無數各路賊壘一律蕩平當將縣城克復
李定太現已就近馳赴衢州會勦著卽乘此聲威痛

加勦洗迅解城圍衢州鎮總兵饒廷選所轄地方連失三城不能進圖規復實屬因循貽誤著卽革職仍帶罪留營以觀後效

晏端書又奏言金華所屬武義之賊伏匿不出周天受飭都司榮陞率銳卒數十人直薄城下焚燬賊壘一座餘匪奔入城內現擬設法進攻惟東陽後路空虛深虞該逆旁竄周天受復迎

提副將陳開選帶勇一千名馳往扼紮一俟周
天培由壽昌回軍卽當會督各隊急攻武義並
襲永康以期廓清金屬進圖處州至溫處道俞
樹風由青田進兵五月初一初三等日會同參
將張清標等帶台閩各勇水陸夾攻疊獲勝仗
其青田至溫州水陸並通之路王景澄已於湯
溪等要口各築土牆安設礮位由遊擊孫豐煥

督率兵勇巡防又於石郭西溪等處各紮兵團
防守王景澄仍督同永嘉縣知縣高樑村在郡
城帶勇策應惟賊情叵測時萌窺伺官兵仍形
單薄臣復飛調衢防之台溫處各標官兵馳往
協助署處州鎮總兵福昇已於五月十八日酌
帶弁兵由龍泉繞道馳抵青田會籌防勦奏入
報

十七日酉辛福興奏言臣前在衢郡接仗受傷連

日在營醫治據醫者云必須假以時日先將槍
子用藥拔出方可望痊伏念衢防軍務正當喫
緊而臣以槍傷未愈不克臨陣指揮實深焦灼
現在李定太督率所部已於本月初一日抵衢
得此勁旅兵力較厚臣部下兵勇雖止二千餘

人尙屬得力且各營管帶員弁皆在江南效力
有年與李定太尤多熟悉惟有顧懇

天恩俯念臣傷疾未痊給假一月俾得安心在營調理

臣所統兵勇卽請暫歸李定太督帶以資調遣
奏八

上命軍機大臣傳諭福興晏端書周天受曰前已有旨
諭令福興來京旣據奏稱傷難速愈著不必拘定日

期俟傷痕平復再行來京其所帶兵勇前諭周天受
會同耆齡或商同晏端書酌派得力將弁帶赴閩省
援應浦城等處茲據福興奏稱總兵李定太已抵衢
州卽將所部官軍暫歸統帶自必得力惟衢州兵勇
足敷攻勦而閩省匪勢臨張此項兵勇如業經晏端
書周天受等派赴福建仍著催令速進不得專顧衢
防致閩省無兵援救

十八日

壬戌

福興奏言衢州圍城逆匪自上月二

十七二十九兩日

臣親督兵勇兩次力戰賊膽

俱寒適值總兵李定太一軍行抵衢郡先在北
門外駐紮擬再由沙灣一路步步爲營乘機進
剿詎該逆見我聲威愈盛賊計愈窮卽於初五
日丑刻暗將營壘焚燬率衆宵遁臣遙見火光
四起知賊已竄逃卽派總兵李定太等分軍從

東南兩路跟蹤追擊並令李定太趕緊探明大股賊匪趨向督隊尾追務將逆衆殲除以杜四竄奏八

上命軍機大臣傳諭晏端書周天受曰衢州賊匪宵遁福興已令李定太等分從東南兩路跟蹤追擊現在處州府城及縉雲等縣尙未克復儻令此股逆匪得與會合則賊氛益熾勦辦愈難措手著晏端書周天

受卽飭李定太等探明此股逆賊現竄何處迅速督
飭大隊實力追剿不得任其與處州等匪聯絡並須
嚴杜常山等處匪徒續行下竄以免蔓延至衢州雖
已解嚴仍應防匪蹤回竄並著晏端書等飭令該地
方文武嚴密防守毋稍疏懈

二十日 甲子 晏端書奏言衢州城外賊營林立惟

東路最爲堅固五月二十七日福興從沙灣進

兵衛城之師繼至其樟樹潭一軍亦派勇梟水
過河會勦燒燬賊卡二座二十九日各路兵勇
先後以草柴拋入賊濠繼以火器燒燬東南角
賊營一座陶茂森復由沙灣繞至白茅田鋪地
方燒燬賊館一所六月初一日我軍三面圍剿
西南路賊援屬至我軍竭力抵禦復斃賊六百
餘名李定太由壽昌統帶全隊行抵衛城軍威

大振該逆開掘地道均被我軍挖盡並有賊營
棚長李鴻發等赴衢州軍營投誠林福祥等令
其仍回賊營解散作爲內應初四日二更時見
東南賊營火起我軍先以大隊攻其東路將賊
營十一座一律焚燬其西南各賊營尙復開礮
拒敵我軍合力進攻頃刻間火光燭天西南兩
路賊營俱成灰燼斬斃逆匪無算各路敗匪或

竄江山或竄常山或竄往處州一路衢州郡城業已解圍李定太已接署衢州鎮篆所有分兵追勦事宜當與周天受妥商辦理以期廓清浙境此次在事出力員弁兵勇著有微勞可否容臣擇尤保奏正在繕摺間准周天受函稱武義之賊周天培於初二日從壽昌回軍督隊進勦連獲勝仗初七日夜間四面環攻至初八日子

時業已克復縣城現在移師進取永康等語並
堪仰慰

宸廑奏入

上諭內閣曰衢州圍城之賊經道員繆梓等約會進攻
福興從沙灣一路督兵進剿燒燬賊卡賊營斬斃逆
匪無算餘匪四散奔竄府城解圍其竄踞武義縣城
之賊據奏亦經周天培從壽昌督兵回剿將縣城克

復勦辦尙爲得手著晏端書周天受嚴飭各路鎮將
跟蹤追勦分投掃蕩將失陷各城次第克復毋令蔓
延在事出力員弁兵勇著有微勞准其擇尤保奏

晏端書又奏言常山之賊分股竄陷開化偏近
婺源三月二十五日賊由德興縣撲犯黃瓜尖
嶺等處連日被各路團勇截殺斬獲多名該逆
由橫路竄入羊嶺適樂平縣民團越境助勦會

同擊退遂由羊嶺至浮梁東埠街圖竄祁門初
四日竄至興田代理祁門縣知縣林用光督勇
迎擊斬獲多名餘匪由白茅港竄往建德此徽
州官軍民團擊賊之情形也江西候選道李元
度平江營之師於三月初十日接防玉山其時
賊踞七都球該道兩次派兵擊退又因衢州之
圍未解令左營營官童梅華等進紮關口等處

十九日常山之賊傾城來犯代理常山縣知縣
李鵬揚與童梅華等合力堵擊該逆以四千人
圍住左營我軍用劈山礮轟斃四五十賊連戰
十餘次將前隊悍賊二百餘人勦殺殆盡追過
白石街二十里沿途斬殺百餘名此玉山官軍
擊賊之情形也奏入報

二十二日

丙寅

李孟羣奏言麻城竄賊由楚豫敗

回後復肆猖獗知府袁懷忠督勇於五月十二
十三等日邀擊於茅坪流波礮一帶該匪連夜
竄逃折往霍山漫水河一帶分踞山險乘隙窺
伺查逆首僞承天豫卽四眼狗夙稱狡悍茲盤
踞霍境亟應先事勦除五月十三日臣分派兵
勇馳往霍山邀擊該逆在漫水河一帶修築土

城以圖固守知縣王自輅等於二十三、四等日帶隊分路進剿將賊擊敗該逆連夜退竄潛太交界地方維時臣復調袁懷忠由六安前往助剿並諭令賊如敗退卽由霍山折往舒城西路合力攻城適有營總訥依琿阿管帶馬隊二百名自楚豫追剿至流波磴因賊匪南竄仍擬折回楚境臣處步軍剿賊正須馬隊相輔而行因

卽就便截留頃探得四眼狗一股復糾集潛太
賊匪數千人分路竄來均離縣城六七十里王
自輅勇力太單臣當令誦依琫阿會合袁懷忠
馳往援剿又舒城賊首朱鳳魁擁衆五六千人
城外有賊營四座沿河一帶均設賊卡攔截我
兵二十九日副將盧又熊率領弁勇由白洋鋪
渡河進剿分三路抄擊殺賊七十餘名六月初

三日乘勝移營離城五里之三門墻該逆復出城撲營都司徐邦道等一齊衝殺斃賊三百餘名餘匪敗竄入城我軍連夜將營盤修固以便進攻茲於初三日接奉

諭旨飭臣速赴清淮自當由此路進兵惟南路霍潛一帶賊蹤出沒無常現已約集馬步赴霍合剿而分攻舒城之兵又已臨城下連接數仗仍須接

替有人庶免賊匪跟蹤而進及窺犯六安以爲
庸州正陽後路之患臣將川餉發給各營後卽
當輕騎赴廬稟請撫臣調度奏入

上命軍機大臣傳諭勝保翁同書李孟羣曰該藩司現
在分攻霍山舒城意在肅清南路翁同書已補授安
徽巡撫南北兩路均宜統籌兼顧著與勝保悉心商
酌如懷鳳緊要仍傳諭該藩司馳往協勦歸勝保節

制其霍山舒城之賊亦須派員接辦毋令該匪窺伺六安爲廬州正陽後路之患

李孟羣又奏言營總訥依琿阿所帶屬隊係自湖北越境追剿經臣咨令會同臣軍進攻舒霍據該營總兩稱若未奉湖北檄文仍須帶隊由張家塆回楚查湖北馬步官軍均已奉

旨東征原當分路並進以蹙賊勢該馬隊現已行抵臣

營未便再行折回相應請

旨飭下湖北督撫江甯將軍卽派該營總協同進剿奏

八

上命軍機大臣傳諭官文都興阿胡林翼曰營總訥依
璦阿所帶馬隊自湖北越境進剿已抵李孟羣軍營
現在邊境肅清東征之師業已分路並進著官文都
興阿胡林翼飭令該營總帶隊協同該藩司進剿毋

庸由張家塆折岡庶馬步相輔而行勦辦較爲得力
二十三日丁卯王懿德慶端奏言江右逆匪闖入

閩境疊陷城池署延建邵道趙印川駐守建陽
縣麻沙一帶五月十八日該逆糾合土匪分路
攻撲麻沙因賊衆兵單官軍挫潰趙印川力戰
陣亡革員張從龍等進勦浦城政和各路之師
均未得手傷亡員弁兵勇甚多刻下建陽危在

旦夕設有疏虞則建甯郡城寇氛愈偏堵勦倍
形棘手所有遊擊趙方等各軍業經飛飭駐紮
建陽固守縣城續調福甯兵二百名扼守石屯
助防以杜浦城政和逆匪分股下竄之路並飛
催護理建甯鎮總兵林向榮速統勁兵星夜馳
赴建甯會同臬司保泰妥籌調度一面另調各
營精兵派員管帶剋日馳赴建邵一帶由保泰

酌量緩急會籌調遣惟建陽浦城政和各軍新
遭挫失驟難得力現調師旅一時緩難濟急惟
有仰懇

天恩飭江西撫臣耆齡速檄卽選道張運蘭蕭啟江所

統老湘營得勝之師就近來閩以維大局奏入

上命軍機大臣傳諭王懿德慶端曰前據該督等奏福
建軍情緊急請飭張運蘭蕭啟江各軍赴援當因張

運蘭等已調往浙江諭令福興將所帶兵勇二千五百名交耆齡會同周天受酌派得力將領帶赴浦城等處協同攻剿現在浦城政和各路尙未克復趙印川復因堵禦麻沙逆匪力戰陣亡不特建陽危急卽建甯府城亦甚喫緊而浙省衢城解圍本日復據何桂清奏探聞常山開化江山等縣均已克復則浙省情形稍鬆自應分兵策應閩省福興所留兵勇是否

已赴閩境著王懿德等飛咨晏端書周天受等務卽
催提迅往浦城等處與閩兵兩路夾擊如果衛防不
必多兵李定太所帶兵勇亦可酌撥前往閩境協同
攻剿趙印川帶兵素稱得力遽因軍挫陣亡殊堪憫
惻著將被害情形查明請卹王懿德現因患病賞假
兩箇月調理惟軍情正當緊急所有調度機宜仍著
慶端與該督隨時商辦以期早靖賊氛

上又命軍機大臣傳諭晏端書耆齡周天受曰本日據王懿德等奏趙印川在麻沙力戰陣亡建陽危急建甯府賊氛偪近等語閩省將募兵單且與浙江江西接壤江西撫建各屬漸就肅清其敗竄之賊勢必闖入閩境現據何桂清奏探聞江山常山開化三縣先後克復周天培一軍復攻克武義永康二縣金華紹興解嚴是浙江軍情已鬆所有福興兵勇著晏端書

著齡周天受等迅卽派員統帶赴閩毋再延緩李定
太一軍屢經克捷衢州與浦城相距甚近能令該總
兵由江山移勦浦城與閩兵夾擊當可得力著晏端
書周天受就近妥籌調撥此外江西各軍如可酌調
並著著齡察看情形毋分畛域調往協勦

同日何桂清奏言浙東軍務自李定太克復壽
昌後卽進紮衢州甫三日而城圍已解江山常

山開化三縣亦先後收復又據周天受稟督飭
周天培於六月初八日克復武義永康二縣現
在乘勝進攻縉雲宣平數日之間三衢肅清金
華紹興各府亦已解嚴浙東既有轉機東南全
局當可無虞奏入報

二十四日
戊辰署閩浙總督福建巡撫慶端奏言

江右大股賊匪現已悉竄入閩順昌一帶土匪
復與勾結延建邵徧地逆蹤蔓延日甚臣自應
親往督師以作士氣現添調漳州兵五百名交
遊擊張拔高管帶水師提標兵三百名交守備
彭奮超管帶興化營兵二百名交守備陳青管
帶雲霄營兵二百名另募雲霄壯勇四百名交
把總翁大英等管帶又添募泉州壯勇六百名

交勇首莊廷永管帶並調省標兵四百名交遊
擊吳忠貴管帶聽候臣定期親自帶赴延平駐
紮調度一面飛催江西撫臣速飭卽選道張運
蘭蕭啟江兩軍星夜由崇安一帶入閩會勦

慶端又奏言據建甯縣知縣趙圻稟稱五月初
九日密飭典史徐遂安親赴東鄉會同練首及
千總杜鵬飛等管帶兵勇合力進攻該逆見我

軍勢盛皆在城外紮營將城內衙署倉庫廟宇
民房盡行燒燬趙圻知賊有竄志商同在事文
武率衆力攻燒燬賊寨十餘座該逆自相踐踏
向東路溪口地方奔逃我軍乘勢追擊殺賊千
餘名遂將建甯縣城克復現飭統領上游軍務
臬司保泰嚴督該營縣搜捕餘匪並將善後撫
輯各事宜妥爲籌辦奏入均報

聞

二十五日己張芾奏言浙省軍務數月以來統
歸總兵周天受調度屢失事機己革遊擊楊國
正縱兵殃民釀成巨禍周天受兵勇又到處滋
擾民心日離兵心日懈致賊橫行肆竄種種貽
誤請爲我

皇上陳之賊之始犯江山縣也楊國正疊次潰退所部

衛勇入城搶掠當舖姦擄婦女與團丁互鬪多
斃良民賊遂乘機而入楊國正遁回衢城追賊
陷常山圍衢州而思內竄也周天受紮營樟樹
潭三次擊賊獲勝不爲無功乃周天受驟勝而
驕全旺草嶺嶺爲下游要道僅派三百人扼守
三月二十日賊由山僻竄越倉猝間周天受率
兵尾追師經湯溪有強占民房殺民燒屋等事

其親軍小隊繞道蘭谿肆擾鋪戶激變民團被
傷弁勇數人周天受輒欲派隊往勦而賊已自
靈山進陷遂昌直逼處州矣處州之失守也周
天受在金華閱三日尙未得知其取道宣平進
兵也行五六日始抵餘嶺四月初七日出隊遇
賊驟退又以明安泰亂次之師守桃花嶺至險
之路一聞警信同時潰奔陣亡員弁數人兵勇

數百遺失軍火器械無算退守金華縱掠如故
自是縉雲永康武義宣平相繼不守金華甚危
今已兩月調集各處勁旅數千進攻武義永康
兩小邑任意遷延精銳愈衰驕矜愈甚五月十
三日金華鄉團以兵勇搶奪耕牛台詞赴懇周
天受遽飭親軍開槍致斃五十餘人復閉城捕
殺三十餘人幸地方紳士調停排解而周天受

指爲奸民通賊尙欲究辦公論譁然兵民交惡
在在可危且周天受職司總統於庸懦失機之
將弁未聞糾叅轉以楊國正心跡可原擬請保
留錄用倒行逆施殊不足膺此重任至周天受
由臣保舉此次調派援浙辦理不善理合自行
檢舉請

旨將臣
交部議處奏入

上命軍機大臣傳諭和春何桂清曰總兵周天受經朕
特加提督銜總統浙江軍務應如何力圖報稱若如
張芾所稱該總兵自樟樹潭三次獲勝遽行驕恣種
種貽誤並縱容兵丁搶掠於庸懦失機之已革遊擊
楊國正未能叅辦實屬大負委任該總兵於全旺等
處如何疏於堵剿以致賊蹤蔓延處州縉雲其進攻
武義永康如何遷延何以指金華鄉團爲通賊遽行

捕殺至數十名之多何以兵勇到處殺掠毫無聞見
其於楊國正是否有心袒護均著和春何桂清確切
查明嚴行叅辦

上諭內閣曰前因晏端書奏浙江軍務總統需員當降
旨將周天受賞加提督銜督辦浙江防剿事宜茲據
張芾奏稱周天受調度乖方縱兵騷擾在湯溪蘭谿
等處沿途焚掠並有擅殺鄉團指爲通賊情事似此

漫無紀律本應從嚴懲辦姑念武義永康次第收復該員尙有微勞著從寬先行革去提督銜毋庸總統浙江軍務仍責令帶兵勦賊以觀後效張芾曾經奏保周天受赴浙援勦並著交部議處現在金衢嚴各屬失陷地方均已先後克復儻有不肖兵勇於賊去之後藉端搜括財物甚至焚燬城市村莊帶兵將弁不能約束者一經叅奏朕必按律嚴懲決不寬貸將

此通論知之

同日晏端書奏言武義軍情經周天受飭令都司榮陞移營進紮後總兵周天培亦自壽昌移師督勦六月初六日我軍紮出青龍山該逆擁衆圍撲周天培等分路抄擊槍斃黃衣馬賊數名賊勢稍卻我軍乘勝將東北賊卡一律焚燬周天培卽於初七日親督諸軍移營進逼賊根

是夜二更時先攻東北兩門噴筒火箭拋射入
城北門城樓火發馬承恩等首先登城連砍守
城悍賊數名一擁而上逆衆突開東門向永康
大路竄去初八日子時克復武義縣城各營繳
驗長髮首級三百二十餘顆生擒二百四十三
名正法救出難民二千餘人永康賊匪經和春
派令副將陳開選一軍到浙臣卽咨會周天受

飭赴永康會勦六月初八日遊擊吳再升等進
攻西路連焚賊壘三座惟時周天培派令榮陞
等自武義馳往助勦聲威益壯該逆四散狂奔
吳再升等追出縣南二十餘里勦斃無算餘孽
竄往縉雲大路而去永康縣城於初八日午時
克復至衢州解圍後李定太等飭知縣丁峻等
帶領各軍進攻常山副將陶茂森等帶領各軍

進攻江山候選道李元度亦由屏風關進兵會
攻六月初四日李元度勦賊於曹會關常山之
賊驚惶夜遁初五日黎明李元度派同知彭斯
峯等分帶兵勇直抵縣城截住後隊之賊勦斃
多名卽將常山縣城收復江山餘孽聞風膽落
於初六日盡竄浦城處州大路而去陶茂森等
旋卽收復江山縣城總兵秦如虎自壽昌回防

遂安督令已革遊擊夏寶慶等各帶隊伍進攻
開化城內之賊及華埠踞匪先已聞風潛竄與
常山之賊均向浦城逃逸夏寶慶等跟蹤搜剿
餘賊並將華埠賊壘踏毀當卽收復開化縣城
李定太等接據各路文報卽令衢州府知府訥
勒恆額前赴江常開三縣辦理安撫事宜一面
札飭已革守備翟先仲等帶隊馳赴湯溪以杜

下竄督防龍游之副將朱承先等移營進紮靈山以防回竄仍酌派兵勇屯駐郡城江山之間以爲各路策應俟布置已定卽從遂昌松陽進兵會攻處州奏入

上諭內閣曰逆匪竄踞浙江武義等縣經周天受調派各軍分投剿辦數日之內連復五城辦理尙爲妥速所有在事出力員弁兵勇著晏端書擇尤酌保

晏端書又奏言節次拏獲奸細據供該逆不能
逞志於金衢嚴處必竄至溫郡勾通海洋盜艇
分竄各省沿海口岸等語現在官兵進剿處州
儻該逆被勦窮蹙直竄溫州則將滅之寇勢恐
復熾臣已飛咨周天受迅派勁旅二千遴員管
帶由台州馳赴溫州會同該鎮道等實力防剿
以杜下竄一面與李定太會師夾攻務將處州

全境之賊悉數殲除奏入報

聞

同日

上諭內閣曰浙江衢州鎮總兵李定太著幫辦和春軍務所有浙江剿匪事宜均歸總統

二十七日辛未曾國藩奏言臣前奉

諭旨令臣馳驛前往浙江辦理軍務伏念浙江完富之

區關繫東南大局賊勢方張亟應迅籌援剿遵
卽於初七日自家起程十二日抵長沙與撫臣
駱秉章會商一面飛飭蕭啟江張運蘭王開化
等由撫建拔營進駐鉛山縣之河口鎮臣擬由
水路至九江登陸遄抵河口大營卽督率星馳
赴浙奏入

上諭曰汝此次奉命卽行足徵關心大局忠勇可尚俟

抵營後迅將如何布置進剿機宜由驛馳奏

同日和春奏言查南門雨花臺爲城中賊匪出入要路屢次衝撲皆從此分股而來張國樑因移大礮數尊於臺之左右各營不時轟擊遙見臺中屋瓦皆飛該逆屯紮不住現已避至臺後兩面添築高牆直達南門城根鼠伏不出其東北各門之賊亦皆藏匿惟西北隅三山一帶濱

臨大江爲水上接濟必由之路自上下兩關以迄七里壽德等洲尙有逆營數處互相應援來往賊船無不取道於此五月二十九日水師遊擊賴鎮海見壽德洲竄出賊船數隻窺我水營另有數船駛赴北岸探尋路徑意在乘虛外竄當卽飭令三板各船協力撓拏水勇由北岸溯流合剿斃賊數十名餘悉遁回下關六月初八

日探報上游賊黨裝載米糧油鹽等物接濟金陵當飭舟師分投迎截是夜三鼓見大號逆船數隻順流下竄都司盧起升等督駕長龍快蟹船前後包抄殺賊百餘名奪獲旗械米石雜物甚多其七里洲一帶賊船每乘風雨月黑之夜潛蹤外竄均卽隨時擊退近處接濟現又漸次肅清矣惟沿江賊壘自蕪湖太平直達繁昌銅

陵以上南北兩岸分屯密布遙爲金陵聲援洪
逆被圍情急屢以血書求援而上游逆黨又緣
官兵恢復九江紛紛下竄其屯聚之處大率以
蕪湖繁昌爲巢穴而分踞奎潭石峴峨橋等處
往來撲擾飄忽靡常五月十二日李德麟挑選
奮勇隊伍分路登岸潛赴賊營左右埋伏親督
師船夤夜駛近神塘開礮轟擊該逆錯愕自相

踐踏殲殪六七百名餘皆回竄當將賊壘二座
踏毀其南岸繁昌石峴股匪竄踞峨橋五月十
五十九等日糾合醜類撲犯水營遊擊李起高
郭定猷等整列排槍連環遞進將賊隊橫衝數
段賊始驚竄逐北二十餘里二十二日郭定猷
等會檣峨橋逆壘奎潭石峴等處各出悍賊數
千並有賊船四十餘隻圍撲艇船以圖牽掣我

軍水陸追勦往還數次擊沈賊划四隻砍取首級百餘顆援匪各鳥獸散二十四日鴉山峨橋各路悍匪數千直撲龜港水營我軍設伏馬步橋俟賊隊偪近伏兵齊起槍礮環轟該逆踉蹌奔潰追殺十餘里殲匪二百餘名六月初二日吳全美督飭舟師會同李德麟所部由魯港規取峨橋分兩翼並進轟擊逾時以逆壘高堅未

能猝拔探聞石峴股匪製造礮划火箚意圖大
逞當檄皖南道鄧瀛就近派兵助剿仍飭該鎮
等協力巡防廓清江面

和春又奏言安徽壽春鎮總兵鄭魁士前奉

諭旨由廬州前赴江南軍營助剿茲該總兵帶同遊擊
朱景山等並隨營文武數員親軍百餘名於六
月初一日到營查江南軍營鎮將調赴浙江不

聞

少現在圍剿正值喫緊而地方遼闊紮營之處
均極險要必須得力大員督率防剿方能周密
該總兵勇敢善戰所有紫金山一帶官軍應責
令統帶以期得力奏入均報

二十八日
壬申晏端書奏言金華府屬自永康武

義二縣收復後永康餘匪竄併縉雲武義餘匪

竄併宣平周天受當飭副將陳開選從縉雲進
勦總兵周天培從宣平進勦陳開選移師行抵
縉雲該逆迎拒於十餘里外勢甚囂張陳開選
以馬隊分投衝擊該逆紛紛奔潰我軍乘勝追
勦擒斬及潦巖落澗死者不可數計當於六月
初九日將縉雲縣城收復周天培督同遊擊馬
承恩等從武義跟蹤追勦而宣平賊援麇至周

天培親督諸軍分路包抄焚燬各路賊卡該逆
從東路拚死竄出殲斃無算餘匪盡向處州遁
去六月初十日克復宣平縣城現周天培已由
宣平往攻松陽陳開選已出紫桃花嶺卽擬兩
路進兵合攻處州並飛咨周天受先撥得力將
領統帶勁旅二三千由開道馳赴青田兩面夾
攻李定太一俟衢防布置完密卽從遂昌松陽

進剿直抵處州以冀速除餘孽出力員弁兵勇
可否彙請獎敘奏入

上諭內閣曰浙江永康武義餘匪分竄縉雲宣平副將
陳開選等分路進剿被陷各縣次第攻克著李定太
督率將弁進攻處州等處迅圖克復毋稍遲延此次
出力員弁兵勇准其彙案請獎